

Museo Numismatico pronto lo habri riba su portanan cu exposicion di conoce e historia di Aruba atrabes di su placa

ORANJESTAD - Diaranson ultimo durante di conferencia di prensa di gobierno Minister di Cultura, sr. Ramon Lee, a haci uzo di e oportunidad pa introduci e cara nobo di Museo Numismatico. T'asina cu Museo Numismatico ta cla pa cuminsa opera denter di poco for di nan establecimiento na Weststraat tras di e stacion di Arubus na Playa. 3 di September proximo e museo cu ta specialisa den moneda ta tene un exposicion yama "Numismatic Timeline Aruba" cual ta traduci na papiamento como "e historia di Aruba atrabes di placa." Cu e apertura aki e museo di placa funda pa defunto sr. Mario Odor lo habri un capitulo nobo bou di guia di su dinamico directora nobo, srta. Daisy Croes, kende por cierto ta nieta di e fundador. Awor cu un aparencia mas moderno, profesional y cu mucho mas informacion cu nunca e museo den su edificio nobo lo ta hoy a pa un y tur aprecia. E prome impresion cu ta haya asina drenta e exposicion, ta uno di un museo

moderno cu ta stimula bo curiosidad pa busca mas informacion di e diferente obhetonan cu ta exhibi den diferente vitrina modernoeiden. E exposicion ta hiba bo riba un biahe dor di tempo cu ta relata henter e historia di Aruba atrabes di su moneda y placa. Desde tempo di e prome habitantenan pa tempo di e diferente colonisadonan, for di placa di tempo di guera pa prome cu independencia y te awor. Tur cu nan descripcion y historia tras di nan bon presenta den cuadranan informativo y interactivo. Awor cu e presentacion nobo e museo tambe tin miho oportunidad duna guia atrabes di nan expertonan manera Ruben y Raquel Odor. Minister Lee a haci un bishita personal na e museo pa pone su mes al tanto di e desaroyonan y a keda sumamente impresion. Minister Lee a haci un invitacion na prensa pa haci un cita adelanta cu e fundacion prome cu e apertura pa asina haya un primicia di e exposicion y asina sigui informa comunidad di e bunita proyecto aki. E proyecto



aki ta un adiccion mas den cuadro di e vision cu Minister Lee a trece pa cu maneho di cultura di Aruba y cual por cierto lo ta parti di e rutan cultural cu lo pasa dor di Oranjestad y subsecuentemente Aruba. E

integracion di elementonan cultural di nos pais den e producto turistico di Aruba ta cuadra cu e pensamiento cu desde un principio Minister Lee a declara, esta su deseo pa mira cultura di Aruba bira parti central di tur desaroyo na Aruba.

Cu stapnan chikito pero cu resultadonan palpable e maneho di cultura ta produciendo su frutanan den e.o. celebracion di 18 di maart, dia di San Juan y exhibicionnan artistico cultural. Cultura ta nos identidad ban sostene.